

NGĀ TAUMĀHEKEHEKE TOI RĒHIA

Tūpapahū ana tērā te rohe o Aotea i te takahanga o te hākerekere, o te mānitini kia tae atu ki Hāwera ki te whai wāhi atu ā-haka, ā-mātakitaki noa ki ngā taumāhekeheke toi rēhia e tū nei ia rua tau.

Kātahi anō ka kō te reo tāwhiri o ngā iwi o te nenewhatanga o te rā kia whakarauika te motu ki tō rātou rohe hei rauhitanga mā rātou.

I tū te pōhiri ki ngā ope o te motu ki King Edward Park, ā, ātaahua ana tērā te rārangi mai o ngā wāhine o te tangata whenua - ko te poi ki te ringa, ko te raukura i titia ki ngā makawe, he pango ngā kākahu. Nō te haerenga o ngā reo whakatau o ngā kuia ka puta ōna tore kai huruhuru me ā rātou taiaha ki konā pīkarikari ai, whakapātaritari ai i te tira whakaeke.

Ka mutu ngā whakatau o runga i te marae ka tau mai tōna āhua pōuri te korenga i āta rangona o ngā waiata nā te kaha o te tuakaihau o te manuhiri i te tangata whenua. Aua atu, i whakatauhia mātou i runga anō i tā te tangata whenua whakatau i te manuhiri.

E toru rā e haere ana ngā mahi a te rēhia, ā, ko tōna rua tekau mā whā nei ngā rōpū i eke ki te mura o te ahi ki reira whakaatu ai i tāna i ako ai. I runga anō i ngā whakarite mō ēnei o ngā whakataetae, i whakawehea ngā kapa kia toru ngā wāhanga, ā, tokowaru ngā kapa ki ia wāhanga. Ko te tuatahi me te tuarua o ia wāhanga i tū anō i te ata o te Rātapu, ā, ko te toa o taua tokoono te toa o te motu. Whakatauhia ana ko Te Waka Huia, o roto o Tāmaki-makau-rau, te toa mō ēnei rua tau e tū mai nei.

Tino itiiti nei ngā kapa neke atu i te kotahi wā e toa ana ā, ko aua kapa, ko Waihirere o te Tai Rāwhiti (e toru ngā toanga), ko Te Waka Huia (e toru ngā toanga), me Te Rōpū Manutaki (e rua ngā toanga).

Me kī, i tēnei wā, tokowhā ngā rōpū e riro ana i a rātou ngā tūranga teitei o ia mahi. Ko ēnei e toru kua whakahuatia ake nei me Ngāti Rangiwehewehi o Te Arawa. Hoki atu, hoki atu, ko ēnei ngā kapa e eke ana ki ngā taumata, ā, me te aha anō whakapāhunu ana ngā kapa kāore i te pērā rawa te eke.

Heoi anō e hara tēnei i te take i whakatūoi ai. I eke ai ēnei kapa nā te kaha tonu ka tahi, nā te ū ka rua, nā te pai o ngā mahi ka toru. Ki te pēnei katoa ngā kapa kāore e kore ka eke anō ērā.

Ko te take whakahinapōuri ko te taha ki te reo. Kāore i te pērā rawa te pai, kāore i te pērā rawa te hōhonu, kāore i te pērā rawa te hāngai, kāore i te pērā rawa te tika. He āhuatanga tēnei kia āta tirohia. Ko te hunga mātakitaki kei te warea noa iho ki ngā pekepeke, ki ngā pīkarikari engari kāore ngā taringa i te āta whakarongo ki ngā kupu. E umere noa ana, e pakipaki noa ana, e kōwhiowhio noa ana, e hāparangi noa ana, nā te pai noa o te kai a te mata engari ko tua atu he aha te aha!

Ahako e kore e rata ngā kapa ki ngā whakatau a ngā kaiwhakawā, e tika tonu ana kia puta he mihi ki a rātou. Arā atu anō ngā kōrero mō ngā kaiwhakawā engari waiho ki ēnei mō tēnei wā.

Kāti, kia hoki ake anō ngā mihi ki a 'Aotea utanga rau' me ōna kāranganangatanga katoa nāna nei te motu i whakarangatira.

Taranaki Maunga e tū mai rā, Te Wai-nui-a-Rua e rere rā, Ruapehu Maunga e pehupehu mai rā, koutou katoa ngā tohu mauri, ngā tohu mana o te rohe, nei noa rā ēnei mihi iti atu a mātou, a te hunga whakaeke, i rongo nei i te mahana o tā koutou manaaki mai.

Hei konā mai koutou i roto i ngā mihi.